

**Aalisarnermut, Piniarnermut Nunalerinermullu Naalakkersuisoq**  
**Medlem af Naalakkersuisut for Fiskeri, Fangst og Landbrug**

Inatsisartunut ilaasortaq Karl Lyberth



**”Naalakkersuisunut apeqqut: Aalisarnermut Piniarnermullu Naalakkersuisup avannaaniuna aalisartut kisiisa soqutigigai?” Pillugu Naalakkersuisunut apeqqummut nr. 93-imut akissut.**

13. oktober 2009  
Dok.nr. 240001  
Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@gh.gl

Aalisarnermut Piniarnermullu Naalakkersuisup avannaani aalisartut kisiisa soqutiginerai pillugu Naalakkersuisunut apeqqutit Naalakkersuisoqarfimma 5. oktober 2009-mi tiguaa. Matumuuna Naalakkersuisut sinnerlugit apeqqutit akissavara.

*Aalisarnermut Piniarnermullu Naalakkersuisup avannaaniuna aalisartut kisiisa soqutigigai?*

Apeqqummut naaggaartariaqarpunga. Aallarniutigalugu nalunaarutigissavara Naalakkersuisut aalisarneq pillugu inatsimmi siunertat pillugit aalajangersakkat innersuussutigalugit inuiaqatigiit aningaasaqarnerannut tunngasunik sulii salliutitsisinnaammata, aalisarneq pillugu politikiminnik qaqugukkulluunniit aalajangersaanerminni. Tassunga ilanngullugu suliaasaqartitsinermit inuussutissarsiornermullu, kiisalu nunap immikkoortuinut tunngatillugu.

Aammattaaq Nunatsinnut tamarmiusumut Naalakkersuisutut ilisimatitsissutigissavara qaammatinut tulliuttunut angalanissamik pilersaaruteqarama, nunap immikkoortuinut nunamullu tamarmiusumut anguniagaqartumik politikilornissaq siunertaralugu nunatsinni aalisartut soqutiginnittullu allat naapinnissaat pingaarnertut siunertaralugu.

Aammattaaq nalunaarutigisinnaavara juulip aggustillu qaammataanni Kujataani Qaqortumiillungalu Narsamiikkama taakkunanilu kommunimik aalisartunillu ataatsimeeqateqarlunga. Taamatutaaq Qeqqata Kommunanukarnissaq pilersaarutigaara, sap.ak. 44-milu Maniitsuliarnissara pilersaarusiorneqarmat. Piffissami allami aamma Sisimiuliarnissaq ilanngunniarneqassaaq. Allanik ingerlataqarneq pissutigalugu Tunumukarnissaraluaq taamaatiinnartariaqarpara aatsaallu 2010-mi Tunumukarsinnaallunga.

Qaleralinniarnermi ajornartorsiuteqarneq pillugu kommunimit aalisartuniillu siunnersuutissarsiniarlunga aggustip qaammataani ulluni qulini Qaasuitsup

Kommuniani angalavunga. Tamatuma saniatigut Qaasuitsup Kommuniani isumasioqatigiinnermi saqqummiisussatut aggersarneqarpunga. Isumasioqatigiinneq tunuliaqutaralugu Qaasuitsup Kommuniani borgmesteri peqatigalugu qaleralinniarneq pillugu aaqqiissutissatut siunnersuuteqarneq pillugu ataatsimut tusagassiorfinnut nalunaaruteqarpugut.

Taamaattumik ataani atsiortunga isumaqarpunga piffissami kingullermi Avannaani angalanikka taamatut isiginneriaaseqarfigineqassasut, minnerunngitsumik Naalakkersuisut isumaqarmata qaleralinniarpallaarnermik ajornartorsiuteqaleralluttuinnarneq unitsinniarlugu erngertumik suliniaqartoqartariaqartoq. Tamatumani Naalakkersuisunit immikkut tulleriaarinissaq pisariaqarpoq, inissisimanerliornerup tamatuma aaqqinneqarnissaa siunertaralugu, tamannalu Avannaanut tunngatillugu ippassaq Qanoruumi nammineq isumaqataaffigilluinnarlugu oqaatigaat.

Tunngavilersuutinni sineriammi aalisartut allat, taakkununga ilanngullugit Maniitsumi aalisakkerivik aalisartullu aamma ajornartorsiutilerujussuuneri oqaatigaat, taamaattumillu Aalisarnermut, Piniarnermut Nunalerinermullu Naalakkersuisumit tikeraarneqarnissaaq pisariaqartikkaat. Naalakkersuisut immikkoortumut periusissatut pilersaarusionermik, tassunga ilanngullugit nunap immikkoortuinut pilersaarutinik aallartitsipput aamma Qeqqata Kommunianik ilaatitsiviusussanik.

Piujartitsinissamik tunngaveqarluni periutsit iluaqusiullugit ilungersunartumik inissisimanerit aaqqinneqarnissaat siunertaralugu Naalakkersuisoqarfiga susasaqartunik allanik suleqateqarluni politikiliuleruttorpoq.

Naggasiutigalugu Naalakkersuisut erseqqissaatigissavaat Qanoruumi TV-kkut akioriissitsineq qulaani taaneqartoq innersuussutigalugu maannamut Aalisarnermut, Piniarnermut Nunalerinermullu Naalakkersuisup kiisalu Inatsisartunut ilaasortap hr. Karl Lyberthip akornanni Avannaani aalisarnermik inuussutissarsiuuteqarneq pillugu immikkut ajornartorsiuteqarnerup anguniagaqartumik suliniuteqarfigineqartariaqarnera isumaqatigiissutigineqarmat. Taamaattumik ataani atsiortup piffissami kingullermi nunap immikkoortuani angalanera tamatumunnga suleqqaarnerup ilaatut pisariaqartutut isigineqassaaq.

Inussiarnersumik inuulluaqqusilluta

Ane Hansen  
Aalisarnermut Piniarnermut Nunalerinermullu Naalakkersuisoq